

當有所別以示殺禮伸情之義而無可證之例惟在商確稟定而已右議政金構議當初所定只取二十七月之限則日數淺深恐不必拘而既有先正論說則據而行之亦無不可至於私喪一款為其母申心喪禮有明文蓋母子之情無往不申雖有所壓屈而不敢服私喪自申禮所不禁禮官所論似為可據判府事徐文重議今以十月朔即吉則是心制盡於九月晦誠有太遽之嫌以十五日舉行則私喪之制亦盡似為便宜判府事尹趾善亦以禮官議為宜上命以十月望祭即吉○己巳夜巽方坤方有氣如火光月入太微東垣左執法星內○以金鎮龜為左叅贊李世維為執義金相稷為司諫李海朝為正言任陞為弼善金相元為說書○領議政申琬以僚相筵奏不安上劄辭免上賜批慰諭曰右揆所陳意在消融於卿有何不安之端亟遵前旨安心視事右議政金構亦上劄乞免復申前說曰近來朝象儘有可憂以首相體國之純誠其欲消融調劑者未嘗不與臣同今夫年少數輩轉相乖激者豈由於一時爭論不相下之故非真有分明角立之勢也世路愈隘論議漸歧國家所調用不過若而人而若於其間因一時言論之失處分或差則朝著之間遂成畦畛其流之害不可勝言臣意不在於辨是非只欲推明事狀欲望聖心無所係着使咸